

11-bob. Soliqlarni to'lash muddatlarini o'zgartirish

97-modda. Soliqlarni to'lash muddatlarini o'zgartirishning umumiy shartlari

Soliq to'lashning muddatini keyinroq muddatga ko'chirish soliqni to'lash muddatini o'zgartirish deb e'tirof etiladi.

Soliq to'lash muddatini o'zgartirishga ushbu bobda belgilangan tartibda yo'l qo'yiladi.

Agar ushbu bobda boshqacha qoida nazarda tutilmagan bo'lsa, to'lanishi lozim bo'lgan umumiy soliq summasiga yoki uning bir qismiga (bundan buyon ushbu bobda qarz summasi deb yuritiladi) nisbatan, qarz summasiga foizlar hisoblangan holda, soliq to'lash muddatini o'zgartirish mumkin.

Soliq to'lash muddatini o'zgartirish uni to'lashni kechiktirish yoki bo'lib-bo'lib to'lash shaklida amalga oshiriladi.

Soliq to'lashni kechiktirish yoki bo'lib-bo'lib to'lash, shu soliq bo'yicha tegishlicha bir yo'la yoki bosqichma-bosqich qarz summasini to'lagan holda, ushbu soliqni to'lash muddatini o'zgartirishdan iboratdir.

Soliq to'lashni kechiktirish yoki bo'lib-bo'lib to'lash soliqlarni to'lashni kechiktirish yoki bo'lib-bo'lib to'lash imkoniyatini berish to'g'risida qaror qabul qilinguniga qadar yuzaga kelgan qarz summasiga yoki kelgusida yuzaga keladigan qarz summasiga nisbatan berilishi mumkin.

Soliq to'lashni kechiktirish yoki bo'lib-bo'lib to'lash, agar ushbu Kodeksning **99-moddasida** boshqacha qoida nazarda tutilmagan bo'lsa, bir yildan oshmagan muddatga beriladi.

Soliq to'lash muddati o'zgartirilishiga talabgor shaxs (bundan buyon ushbu bobda manfaatdor shaxs deb yuritiladi) soliq to'lashni kechiktirish yoki bo'lib-bo'lib to'lash to'g'risida

ariza berishga haqli. Bunday ariza bir yoki bir nechta soliqqa nisbatan berilishi mumkin.

Manfaatdor shaxsning soliq to'lashni kechiktirish yoki bo'lib-bo'lib to'lash haqidagi arizasini ko'rib chiqish chog'ida, soliqlarni to'lash muddatlarini o'zgartirish to'g'risida qaror qabul qilishga vakolatli organ mazkur shaxsga u bilan kelishilgan holda qabul qilinishi mumkin bo'lgan kechiktirish yoki bo'lib-bo'lib to'lashning ushbu bobda nazarda tutilgan boshqa shartlarini taklif etishga haqli.

Soliq to'lash muddatining o'zgartirilishi soliq to'lash bo'yicha mavjud majburiyatlarni bekor qilmaydi va yangi majburiyatlarni vujudga keltirmaydi.

Ushbu Kodeksning **99-moddasida** ko'rsatilgan organlarning qaroriga ko'ra soliq to'lash muddatini o'zgartirish, agar ushbu bobda boshqacha qoida nazarda tutilmagan bo'lsa, ushbu Kodeksning **107 — 109-moddalariga** muvofiq mol-mulk garovi, kafillik yoki bank kafolati bilan ta'minlanishi mumkin.

Ushbu bob qoidalari penya va jarima to'lashni kechiktirish yoki bo'lib-bo'lib to'lash imkoniyati berilganda ham qo'llaniladi.

Ushbu bobning qoidalari soliq agentlarga nisbatan tatbiq etilmaydi.

98-modda. Soliqni to'lash muddatini o'zgartirishni istisno etadigan holatlar

Agar manfaatdor shaxsga nisbatan quyidagi shartlardan hech bo'lmaganda bittasi bajarilayotgan bo'lsa, soliqni to'lash muddati o'zgartirilishi mumkin emas:

1) agar ushbu moddaning **ikkinchi qismida** boshqacha qoida nazarda tutilmagan bo'lsa, soliq to'g'risidagi qonun

hujjatlarining buzilishi bilan bog‘liq jinoyat alomatlari bo‘yicha jinoiy ish qo‘zg‘atilgan bo‘lsa;

2) ushbu shaxs bunday o‘zgartirishdan soliq solinishi lozim bo‘lgan o‘z pul mablag‘larini yoki boshqa mol-mulkini yashirish uchun foydalanishini yoki ushbu shaxs doimiy yashash uchun O‘zbekiston Respublikasidan tashqariga chiqib ketishini taxmin qilish uchun yetarlicha asoslar mavjud bo‘lsa;

3) ushbu shaxs soliqni to‘lash muddatini o‘zgartirish to‘g‘risida ariza bergan kundan oldingi uch yil mobaynida ushbu Kodeksning **99-moddasida** ko‘rsatilgan organ tomonidan soliq to‘lash muddatini tegishli o‘zgartirish shartlari buzilganligi munosabati bilan ilgari berilgan kechiktirish yoki bo‘lib-bo‘lib to‘lash imkoniyatining amal qilishini tugatish to‘g‘risida qaror chiqarilgan bo‘lsa;

4) bankrotlik to‘g‘risida ish qo‘zg‘atilgan bo‘lsa.

Ushbu moddaning **birinchi qismida** ko‘rsatilgan shartlar ushbu Kodeks 99-moddasining **ikkinchi qismida** nazarda tutilgan hollarga nisbatan tatbiq etilmaydi.

Ushbu moddaning **birinchi qismida** ko‘rsatilgan holatlar mavjud bo‘lgan taqdirda, soliq to‘lash muddatini o‘zgartirish to‘g‘risida qaror qabul qilinishi mumkin emas, qabul qilingan qaror esa bekor qilinishi lozim.

Qabul qilingan qaror bekor qilingani to‘g‘risida manfaatdor shaxs va ushbu shaxs hisobda turgan joydagi soliq organi uch kunlik muddatda yozma shaklda xabardor qilinadi. Manfaaddor shaxs bunday qaror ustidan ushbu Kodeksda belgilangan tartibda shikoyat qilishga haqli.

Soliq to‘lovchilarning konsolidasiyalashgan guruhi bo‘yicha foyda solig‘iga nisbatan soliq to‘lash muddatini o‘zgartirish amalga oshirilmaydi.

99-modda. Soliqlarni to'lash muddatlarini o'zgartirish to'g'risida qaror qabul qilishga vakolatli organlar

Quyidagi organlar soliqlarni to'lash muddatlarini o'zgartirish to'g'risida qarorlar qabul qilish vakolatiga ega organlardir (bundan buyon ushbu moddada vakolatli organlar deb yuritiladi):

1) ushbu Kodeks 17-moddasi birinchi qismining **1 — 5-bandlarida** ko'rsatilgan soliqlar bo'yicha — O'zbekiston Respublikasi Davlat soliq qo'mitasi (bundan ushbu qismning **3-bandida** va ushbu moddaning **ikkinchi qismida** nazarda tutilgan hollar mustasno);

2) ushbu Kodeks 17-moddasi birinchi qismining **6 — 8-bandlarida** ko'rsatilgan soliqlar va aylanmadan olinadigan soliq bo'yicha — O'zbekiston Respublikasi Vazirlar Mahkamasi tomonidan belgilangan tartibda mahalliy davlat hokimiyati organlari. Bunday soliqlarga nisbatan to'lashni kechiktirish yoki bo'lib-bo'lib to'lash imkoniyati ikki yilgacha muddatga berilishi mumkin;

3) O'zbekiston Respublikasining bojxona chegarasi orqali tovarlar olib o'tilishi munosabati bilan to'lanishi lozim bo'lgan soliqlar bo'yicha — bojxona to'g'risidagi qonun hujjatlarida belgilangan tartibda bojxona organlari (bundan ushbu moddaning **ikkinchi qismida** nazarda tutilgan hollar mustasno).

O'zbekiston Respublikasi Vazirlar Mahkamasi soliq to'lovchiga ushbu Kodeksning **17-moddasida** ko'rsatilgan har qanday soliq bo'yicha kechiktirish yoki bo'lib-bo'lib to'lash imkoniyatini uch yilgacha muddatga berishga haqli. O'zbekiston Respublikasi Vazirlar Mahkamasi kechiktirish yoki bo'lib-bo'lib to'lash imkoniyatini berishda ushbu Kodeks 98-moddasining **birinchi qismida** belgilangan cheklovlardan chetga chiqishga haqli.

100-modda. Soliqlarni to‘lashni kechiktirish yoki bo‘lib-bo‘lib to‘lash imkoniyatini berish shartlari

Soliqni to‘lash bo‘yicha muddatni kechiktirish yoki bo‘lib-bo‘lib to‘lash imkoniyati manfaatdor shaxsga, basharti uning moliyaviy ahvoli ushbu soliqni belgilangan muddatda to‘lash imkonini bermasa, biroq ko‘rsatilgan shaxsda bunday soliqni kechiktirish yoki bo‘lib-bo‘lib to‘lash uchun berilgan muddat mobaynida to‘lash imkoniyati yuzaga keladi deb taxmin qilish uchun yetarlicha asoslar mavjud bo‘lsa, berilishi mumkin.

Soliq to‘lashni kechiktirish yoki bo‘lib-bo‘lib to‘lash imkoniyati manfaatdor shaxsga quyidagi asoslardan loaqal bittasi mavjud bo‘lgan taqdirda berilishi mumkin:

1) ushbu shaxsga tabiiy ofat, texnologik falokat yoki boshqa bartaraf etib bo‘lmaydigan holatlar natijasida zarar yetkazilganligi;

2) ushbu shaxsni byudjetdan (davlat maqsadli jamg‘armalaridan) moliyalashtirish kechiktirilganligi yoki ushbu shaxs tomonidan bajarilgan davlat buyurtmasi, davlat ehtiyojlari yoki mahalliy davlat hokimiyati organlarining ehtiyojlari uchun bajarilgan ishlar va (yoki) ko‘rsatilgan xizmatlar haqini to‘lash kechiktirilganligi;

3) manfaatdor shaxs soliqni bir yo‘la to‘lashi oqibatida uning nochorligi (bankrotligi) alomatlari paydo bo‘lishi xavfi yuzaga kelganligi;

4) jismoniy shaxsning mulkiy holati (qonun hujjatlariga muvofiq undiruv qaratilishi mumkin bo‘lmagan mol-mulk hisobga olinmaganda) soliqni bir yo‘la to‘lash imkoniyatini istisno etishi;

5) manfaatdor shaxs tomonidan tovarlar yoki xizmatlarni ishlab chiqarish va (yoki) realizasiya qilish mavsumiy xususiyatga ega ekanligi;

6) O‘zbekiston Respublikasining bojxona chegarasi orqali tovarlar olib o‘tilishi munosabati bilan bojxona to‘g‘risidagi qonun hujjatlarida belgilangan to‘lanishi lozim bo‘lgan soliqlarni to‘lashni kechiktirish yoki bo‘lib-bo‘lib to‘lash imkoniyatini berish uchun asoslar mavjud ekanligi.

Ushbu modda ikkinchi qismining 1, 3 — 6-bandlarida ko‘rsatilgan asoslar mavjud bo‘lganda, soliqni to‘lashni kechiktirish yoki bo‘lib-bo‘lib to‘lash imkoniyati quyidagilarga berilishi mumkin:

1) yuridik shaxsga — uning sof aktivlari qiymatidan oshmaydigan summaga;

2) jismoniy shaxsga — uning mol-mulki qiymatidan oshmaydigan summaga, bundan O‘zbekiston Respublikasining qonun hujjatlariga muvofiq undiruv qaratilishi mumkin bo‘lmagan mol-mulk mustasno.

Yuridik shaxslar va yakka tartibdagi tadbirkorlar soliqni hisobga olish joyidagi soliq organiga yozma, shu jumladan soliq to‘lovchining shaxsiy kabineti orqali xabarnoma yuborib, soliq auditi natijalari bo‘yicha qo‘shimcha hisoblangan soliqlar summalarini, shuningdek moliyaviy sanksiyalarni tekshiruv materiallarini ko‘rib chiqish natijalari yuzasidan soliq organi tomonidan qabul qilingan qaror kuchga kirgan kundan e‘tiboran olti oy mobaynida teng ulushlarda to‘lashga haqli.

Agar soliqlarni to‘lashni kechiktirish yoki bo‘lib-bo‘lib to‘lash imkoniyati ushbu modda ikkinchi qismining 1 yoki 2-bandlarida ko‘rsatilgan asoslar bo‘yicha berilgan bo‘lsa, qarz summasiga foizlar hisoblanmaydi.

Agar soliqni to‘lash bo‘yicha kechiktirish yoki bo‘lib-bo‘lib to‘lash imkoniyati ushbu modda ikkinchi qismining 3 — 6-bandlarida va (yoki) to‘rtinchi qismida ko‘rsatilgan asoslarga ko‘ra berilgan bo‘lsa, kechiktirish yoki bo‘lib-bo‘lib to‘lash

davrida amalda bo'lgan O'zbekiston Respublikasi Markaziy bankining qayta moliyalashtirish stavkasiga teng stavkadan kelib chiqqan holda qarz summasiga foizlar hisoblanadi.

101-modda. Soliqlarni to'lashni kechiktirish yoki bo'lib-bo'lib to'lash imkoniyatini berish tartibi

Soliqni to'lash bo'yicha kechiktirish yoki bo'lib-bo'lib to'lash imkoniyatini berish to'g'risidagi ariza manfaatdor shaxs tomonidan tegishli vakolatli organga beriladi.

Manfaatdor shaxsning soliqni to'lashni kechiktirish yoki bo'lib-bo'lib to'lash imkoniyatini berish to'g'risidagi arizasiga quyidagi hujjatlar ilova qilinadi:

1) ushbu shaxs hisobda turgan joydagi soliq organining uning soliqlar, penyalari va jarimalar bo'yicha hisob-kitoblari holati to'g'risidagi ma'lumotnomasi;

2) ushbu shaxs hisobda turgan joydagi soliq organining mazkur shaxsga banklarda ochilgan barcha hisobvaraqlar ro'yxati ko'rsatilgan ma'lumotnomasi;

3) ushbu shaxsning banklardagi hisobvaraqlari bo'yicha ko'rsatilgan ariza berilishidan oldingi olti oy davomida har oylik pul mablag'lari aylanishi to'g'risida, shuningdek uning haqi to'lanmagan hisob-kitob hujjatlarining tegishli kartotekasiga joylashtirilgan hisob-kitob hujjatlari mavjudligi to'g'risida yoxud ushbu kartotekada ularning mavjud emasligi to'g'risida banklar ma'lumotnomalari;

4) ushbu shaxsning banklardagi barcha hisobvaraqlarida mavjud bo'lgan pul mablag'larining qoldiqlari to'g'risida banklar ma'lumotnomalari;

5) ushbu shaxsning soliqni to'lash muddati o'zgartirilgan davrda soliqni to'lashni kechiktirish yoki bo'lib-bo'lib to'lash

imkoniyatini berish to'g'risidagi qaror qaysi shartlarga ko'ra qabul qilingan bo'lsa, o'sha shartlarga rioya etilishini nazarda tutuvchi majburiyati, shuningdek qarzdorlikni so'ndirishning taxminiy grafigi;

6) soliqni to'lash muddatini o'zgartirish asoslari mavjudligini tasdiqlovchi ushbu moddaning **uchinchi — sakkizinchi qismlarida** ko'rsatilgan hujjatlar.

Ushbu Kodeks 100-moddasining ikkinchi qismi **1-bandida** ko'rsatilgan asos bo'yicha soliqni to'lashni kechiktirish yoki bo'lib-bo'lib to'lash imkoniyatini berish to'g'risidagi manfaatdor shaxsning arizasiga quyidagilar ilova qilinadi:

1) ushbu shaxsga nisbatan uning ariza bilan murojaat etishi uchun asos bo'lgan bartaraf etib bo'lmaydigan holatlar vujudga kelganligi fakti to'g'risidagi xulosa;

2) ko'rsatilgan holatlar natijasida ushbu shaxsga yetkazilgan zararni baholash dalolatnomasi.

Ushbu moddaning **uchinchi qismida** ko'rsatilgan hujjatlar mahalliy davlat hokimiyati organi yoki fuqaro muhofazasi, aholi va hududlarni favqulodda vaziyatlardan himoya qilish sohasidagi organlar, fuqarolarning o'zini o'zi boshqarishi organlari tomonidan tuziladi.

Ushbu Kodeks 100-moddasining ikkinchi qismi **2-bandida** ko'rsatilgan asos bo'yicha soliqni to'lashni kechiktirish yoki bo'lib-bo'lib to'lash imkoniyatini berish to'g'risidagi manfaatdor shaxsning arizasiga bunday asos mavjudligini va byudjetdan (davlat maqsadli jamg'armalaridan) moliyalashtirish hisobiga ushbu shaxsga kelib tushmagan summani yoki ushbu shaxs tomonidan bajarilgan davlat buyurtmasining, davlat ehtiyojlari yoki mahalliy davlat hokimiyati organlarining ehtiyojlari uchun bajarilgan ishlar va (yoki) ko'rsatilgan xizmatlarning haqi

to'lanmaganligini tasdiqlovchi moliya organining hujjati ilova qilinadi.

Ushbu Kodeks 100-moddasining ikkinchi qismi **3-bandida** ko'rsatilgan asos mavjudligi manfaatdor shaxsning moliyaviy holatini tahlil qilish natijalari bo'yicha O'zbekiston Respublikasi Davlat soliq qo'mitasi yoki u vakolat bergan soliq organi tomonidan aniqlanadi. Bunday tahlil O'zbekiston Respublikasi Iqtisodiyot va sanoat vazirligi tomonidan O'zbekiston Respublikasi Moliya vazirligi bilan kelishilgan holda tasdiqlanadigan uslubiyatga muvofiq o'tkaziladi.

Ushbu Kodeks 100-moddasining ikkinchi qismi **4-bandida** ko'rsatilgan asos bo'yicha soliqni to'lash bo'yicha kechiktirish yoki bo'lib-bo'lib to'lash imkoniyatini berish to'g'risidagi manfaatdor shaxsning arizasiga jismoniy shaxsning ko'char va ko'chmas mulki (bundan qonun hujjatlariga muvofiq undiruv qaratilishi mumkin bo'lmagan mol-mulk mustasno) to'g'risidagi ma'lumotlar ilova qilinadi.

Ushbu Kodeks 100-moddasining ikkinchi qismi **5-bandida** ko'rsatilgan asos bo'yicha soliqni to'lashni kechiktirish yoki bo'lib-bo'lib to'lash imkoniyatini berish to'g'risidagi manfaatdor shaxsning arizasiga ushbu shaxs tomonidan tuzilgan, mazkur shaxsning umumiy daromadlarida uning mavsumiy xususiyatga ega bo'lgan faoliyatdan olingan daromadlarining ulushi kamida 50 foizni tashkil etishini tasdiqlovchi hujjat ilova qilinadi.

Mavsumiy xususiyatga ega bo'lgan tarmoqlar va faoliyat turlarining ro'yxati O'zbekiston Respublikasi Vazirlar Mahkamasi tomonidan tasdiqlanadi.

Soliqni to'lash bo'yicha kechiktirish yoki bo'lib-bo'lib to'lash imkoniyatini berish to'g'risidagi manfaatdor shaxsning arizasida ushbu shaxs mazkur bobga muvofiq qarz summasiga hisoblangan foizlarni to'lash majburiyatini o'z zimmasiga oladi.

Vakolatli organning talabiga ko'ra, manfaatdor shaxs garov predmeti bo'lishi mumkin bo'lgan mol-mulk to'g'risidagi hujjatlarni, kafillik xatini yoki bank kafolatini taqdim etadi.

Vakolatli organ manfaatdor shaxsning iltimosnomasi bo'yicha ushbu shaxs tomonidan qarz summasining to'lanishini vaqtinchalik (ariza ko'rib chiqiladigan davrda) to'xtatib turish to'g'risida qaror qabul qilishga haqli. Bunday qarorning ko'chirma nusxasi manfaatdor shaxs tomonidan o'zi hisobga olingan joydagi soliq organiga qaror qabul qilingan kundan e'tiboran besh kunlik muddatda taqdim etiladi.

Soliqni to'lash bo'yicha kechiktirish yoki bo'lib-bo'lib to'lash imkoniyatini berish yoxud uni berishni rad etish to'g'risidagi qaror vakolatli organ tomonidan manfaatdor shaxsning arizasi olingan kundan e'tiboran o'ttiz kun ichida qabul qilinadi.

Soliqni to'lashni kechiktirish yoki bo'lib-bo'lib to'lash imkoniyatini berish to'g'risidagi qarorda quyidagilar ko'rsatilishi kerak:

- 1) qarz summasi;
- 2) kechiktirish yoki bo'lib-bo'lib to'lash imkoniyati berilayotgan soliq;
- 3) qarz summasini va hisoblangan foizlarni to'lash tartibi hamda muddatlari.

Tegishli hollarda soliqni to'lashni kechiktirish yoki bo'lib-bo'lib to'lash imkoniyatini berish to'g'risidagi qarorda garov predmeti bo'lgan mol-mulk to'g'risidagi hujjatlar, kafillik xati yoki bank kafolati ko'rsatilishi kerak.

Soliqni to'lash bo'yicha kechiktirish yoki bo'lib-bo'lib to'lash imkoniyatini berish to'g'risidagi qaror ushbu qarorda belgilangan kundan e'tiboran kuchga kiradi. Bunda soliqni

to'lash uchun belgilangan kundan e'tiboran ushbu qaror kuchga kiradigan kunga qadar bo'lgan butun vaqt uchun tegishli penyalar, agar to'lovning ko'rsatilgan muddati ushbu qaror kuchga kiradigan kundan oldin bo'lsa, qarz summasiga kiritiladi.

Agar soliqni to'lash bo'yicha kechiktirish yoki bo'lib-bo'lib to'lash mol-mulk garovi evaziga beriladigan bo'lsa, uni berish to'g'risidagi qaror faqat ushbu Kodeksning **107-moddasida** nazarda tutilgan tartibda mol-mulk garovi to'g'risidagi shartnoma tuzilgandan keyingina kuchga kiradi.

Soliqni to'lashni kechiktirish yoki bo'lib-bo'lib to'lash imkoniyatini berishni rad etish to'g'risidagi qaror asoslantirilgan bo'lishi kerak.

Soliqlarni to'lash bo'yicha kechiktirish yoki bo'lib-bo'lib to'lash imkoniyatini berishni rad etish to'g'risidagi qaror ustidan manfaatdor shaxs qonun hujjatlarida belgilangan tartibda shikoyat qilishi mumkin.

Soliqni to'lash bo'yicha kechiktirish yoki bo'lib-bo'lib to'lash imkoniyatini berish to'g'risidagi qarorning ko'chirma nusxasi vakolatli organ tomonidan mazkur qaror qabul qilingan kundan e'tiboran uch kunlik muddatda ushbu shaxs hisobda turgan joydagi soliq organiga yuboriladi.

102-modda. Soliqni to'lash bo'yicha kechiktirish yoki bo'lib-bo'lib to'lashning amal qilishini tugatish

Soliqni to'lash bo'yicha kechiktirish yoki bo'lib-bo'lib to'lashning amal qilishi tegishli qarorning amal qilish muddati o'tganidan keyin tugatiladi yoxud ushbu moddada nazarda tutilgan hollarda bu muddat kelishidan oldin tugatilishi mumkin.

Soliqning to'liq summasi va tegishli foizlarning summasi belgilangan muddat o'tgunga qadar to'langan taqdirda soliqni

to'lash bo'yicha kechiktirish yoki bo'lib-bo'lib to'lashning amal qilishi muddatidan oldin tugatiladi.

Soliqni to'lash bo'yicha kechiktirish yoki bo'lib-bo'lib to'lash shartlari manfaatdor shaxs tomonidan buzilgan taqdirda, uning amal qilishi soliqni to'lash bo'yicha majburiyatni bajarish muddatini tegishli o'zgartirish to'g'risida qaror qabul qilgan vakolatli organning qarori bilan muddatidan oldin tugatilishi mumkin.

Ushbu moddaning **uchinchi qismida** nazarda tutilgan hollarda soliqni to'lash bo'yicha kechiktirish yoki bo'lib-bo'lib to'lashning amal qilishi muddatidan oldin tugatilganda manfaatdor shaxs tegishli qarorni olganidan keyin bir oy ichida soliq qarzining to'lanmagan summasini, shuningdek soliqni to'lashni kechiktirish yoki bo'lib-bo'lib to'lashning amal qilishini tugatish to'g'risidagi qaror qabul qilingan kundan keyingi kundan boshlab ushbu summa to'langan kungacha bo'lgan har bir kalendar kun uchun penya to'lashi kerak. Bunda soliq qarzining qoplanmasdan qolgan summasi kechiktirish (bo'lib-bo'lib to'lash) imkoniyatini berish to'g'risidagi qarorda ko'rsatilgan soliq qarzi summasi to'lashni kechiktirish (bo'lib-bo'lib to'lash) amal qilgan davrda kechiktirish (bo'lib-bo'lib to'lash) haqidagi qarorga muvofiq hisoblangan foizlar summasiga oshirilgan summa bilan haqiqatda to'langan summalar hamda foizlar o'rtasidagi farq sifatida aniqlanadi.

Soliqni to'lash bo'yicha kechiktirish yoki bo'lib-bo'lib to'lash imkoniyatini berish to'g'risidagi qaror bekor qilingani to'g'risidagi xabarnoma ushbu qarorni qabul qilgan vakolatli organ tomonidan qaror qabul qilingan kundan e'tiboran besh kun ichida ushbu Kodeksda nazarda tutilgan tartibda manfaatdor shaxsga yuboriladi. Bunday qarorning ko'chirma nusxasi ayni shu muddatda manfaatdor shaxs hisobda turgan joydagi soliq organiga yuboriladi.

Vakolatli organning soliqni to‘lash bo‘yicha kechiktirish yoki bo‘lib-bo‘lib to‘lashning amal qilishini muddatidan ilgari tugatish to‘g‘risidagi qarori ustidan manfaatdor shaxs qonun hujjatlarida belgilangan tartibda shikoyat qilishi mumkin.

Ushbu bobda nazarda tutilgan va manfaatdor shaxs tomonidan to‘lanishi lozim bo‘lgan foizlar ularni to‘lash muddati buzilgan taqdirda hamda ularni to‘lash to‘g‘risidagi talabnomani bajarish muddati o‘tganidan keyin ushbu Kodeksning **15-bobida** nazarda tutilgan tartibda va muddatlarda undiriladi.